

ATAIL TEHN PAS





*“I inoukihong kumwail
me Kauno pahn ketkihdo
manaman kapwuriamwei
kan me E ketin mwahngih
me kumwail anahne sang
ni amwail pahn wiahda
tohnmetei kan pwehn papah
oh kaudok nan Sapwellime
tehn pas sarawi kan.*

— Preseden Russell M. Nelson



Dahme kahrehda Tehnpas Sarawi kan?

Nan ahsoun Kadehde Mering, Kauno ketin tapihada ruwese Sapwellime aramas en inou kan en kawada tehnpas sarawi kan. Ni ahsou me E ketin kapwurehdo Sapwellime Mwomwohdiso, Kauno ketin pil ehu mahsanihong soukohp, Joseph Smith, en kawada tehnpas sarawi kan.

Nan tehnpas sarawi, kitail kin alehda kapai kesempwal akan oh manaman sang rehn Koht.

Ehu kapai me keieu laud me kin kohda nan tehnpas sarawi iei en momour kohkohlahte rehn Koht oh atail peneinei. En kak alehdi kapai wet, kitail anahne en kapwaiada Sapwellime kosonned akan. Sang ni en Sises Kraiss ah tohnmeteri oh manaman me kahrehda met kak wiawi. Kitail kak duwehla Sises Kraiss ni atail pahndadoahngki atail ahsou ong nan tehnpas sarawi oh idawehn Sapwellime karasaras.

Inou Sarawi kan oh Tiahk Sarawi kan

Nan tehnpas sarawi kan, kitail kin wiahda inou sarawi kan ni atail kin iang wia tiahk sarawi kan en sewese kitail kekeirda nan mour wet. Inou sarawi wehwehki inou ehu me kitail wiahng



KILEL EN TEHPAS SARAWI EN KIRTLAND 1836

Koht. Tiahk sarawi iei kemwekid sarawi ehu me wiawi sang ni mweimwei en prihsduhd en Koht. Tiahk sarawi kan kin sewese kitail en wehwehki oh tamataman inou kan me kitail wiahda.

Nan tehnpas sarawi, kitail wiahda inou en peikiong sapwellimen Koht kosonned akan. E ketin inoukiher kapai ong kitail sang ni atail pahn kolokol atail inou sarawi kan.

Nan tehnpas sarawi kelehpw me kitail kak wiahda inou sarawi kan oh alehdi tiahk sarawi kan me anahnepe ong ni sepwildalahng nan wehin selestiel. Iang patehng wia tiahk sarawi kan en nan tehnpas sarawi wia ehu kisehn atail inou en idawehn Sises Kraiss me keieu kaselel oh kesempwal. E pil inenen kesempwal ni atail pahn kaunopada en pwurala kousoanla rehn Ih oh Samatail Nanleng ehu rahn.

Ia Mwomwen Ahi Pahn Kaunopada Pein Ngehi?

Kumwail kak wia soahng tohto pwehn kaunopada ong nan tehnpas sarawi. Ni karasepe, kumwail udahn anahne kapakap ni ngidingid onopiki rongamwahu en Sises Kraiss oh doadoahngki Sapwellime padahk kan nan amwail mour. Kumwail pil anahne wauniki ni mehlel inou sarawi kan me kumwail wiadahr, me duwehte amwail inou sarawi kan en pepdais.

Pepdais wia keieu en tiahk sarawi en rongamwahuo. E wia keieu en dake me keieu anahnepe nan amwail ahl en inou en pwurala rehn Koht. Mwurin pepdais, kitail kin alehda kisakis en Ngehn Sarawi, me pil kin wiawi sang ni ehu tiahk sarawi. Kitail kin katamanda inou sarawi kan me kitail wiadahr ni ahnsou me kitail kin ale kamadipw sarawi wihk koaros nan ihmw sarawi. Ekei tiahk sarawi en rongamwahu kesempwal akan me iangahki kasarawialahn Melkesidik Prihsduhd (ong ohl akan), alahldien endaumen nan tehnpas sarawi, oh katengtengpene nan tehnpas sarawi (nan mour wet de mwurin mour wet).

Tiahk sarawi oh inou sarawi en prihsduhd pwukat me kahluwahdo kapai keieu laud me Samatail Nanleng ketkihong





Sapwellime seri kan—ahnsou mwahu en pwurehng kousoan Reh oh rehn atail peneinei kan mwurin mour wet.

Pepdais Ong Me Melahr akan oh Kasarawihperail

Sounkomouro padahngki me pepdais oh kasarawiala inenen kesempwal. Aramas koaros me inengieng en idawehn Ih oh pwurala rehn Samatail Nanleng udahn anahne en pepdais oh kasarawiala. Ni Sises eh ketin mahsanihong Nikodihmus: “Sohte emen kak pedelong nan Wehin Koht, ma e sohte pahn ipwiki pihl oh Ngehn Sarawi.” (Sohn 3:5).

En “ipwiki pihl” wehwehki en pepdais, oh en “ipwiki Ngehn Sarawi” wehwehki en alehdi kisakis en Ngehn Sarawi sang ni kasarawiala.

Ni ahnsou me Sounkomouro kapwuredohr Sapwellime Mwomwohdiso rehn Soukohp Joseph Smith, E ketin padahngki me pepdais miehthe anahnepe. E pil ketin padahngki me pepdais udahn anahne en wiawi sang rehn emen aramas me ahniki mweimwei en prihsduhd.

KOHT KETIN POAKOHNG SAPWELLIME SERI KAN KOAROS

Aramas koaros wia seri en Koht. Koaros udahn inenen kesempwal Reh. E ketin mwahngih irail oh E ketin poakohng irail. Aramas tohto ahniki ahnsou mwahu en alehda rongamwahuo oh pepdaisla ni ahnsou me irail momour. Ahpw ia pahn mwomwen irail ko me melahr sohte pepdais de pil ese duwen Sises? De irail ko me pepdaisla sang ni kaidehn ni pwuhng en mweimwei? Ia mwomwen arail pahn kak en pil iang komourla? Koht sohte ketin manokehiraila!

Nan tehnpas sarawi, kitail kak wia tiahk sarawi kan en pepdais oh kasarawiala ong irail me melahr ni arail sohte ahniki ahnsou mwahu en alehda rongamwahuo. Tiahk sarawi kan me kin wiawi ong irail kin kahdaniki *tiahk sarawi en me melahr akan* (de *tiahk sarawi en wiliepeh kan*).

Pepdais oh kasarawiala kan en nan tehnpas sarawi me kin wiawi ong irail kan me melahr kin wia kisakis kei me kin sansal sang ni limpoak.

Se kamehlele me mie mour mwurin mehla oh me en emen emen pilipil wia padahk keieu kesempwal. Se pil kamehlele me irail kan me melahr ese me tiahk sarawi kan wiawi ong irail oh irail kak pilada en alehda de soh.

ME PWULOPWUL KAN OH IRAIL TOWE KAPW KAN KAK IANG PATEHNG

Serepein pwulopwul kan oh pwutak pwulopwul kan me kasarawialahr ong Prihsduhd kak iang wia pwukoah wet sang ni kisin likou en mweimwei en pedelong nan tehnpas sarawi me pahn tepida sang ni Senweri en pahr me irail pahn sounpar [eisek-riau] 12. Kisin likou en mweimwei wet kihong irail en kak kohla ni tehnpas sarawi pwehn wia pepdais oh kasarawi ohng irail me melahr akan. Irail towe kapw kan me laud pil kak alehdi kisin likou en mweimwei wet.

Pepdais oh kasarawi en me melahr akan kak wiawi ong pahpa oh nohno kan, pahpa oh nohno kahlap akan, pirien kan, andih kan, angkel kan, koasen kan, oh mehteikan.

Peneinei kan kak kakehlailda sang ni mwekid en kadek wet. Kumwail kak kehn pepehm kehlail ong amwail peneinei oh karanih Koht. Pepehm en ehupene wet kak kihong kumwail kehlail, kaweid, oh koapwoaroapwoar. Met pahn kapaiada amwail mour ni soahng tohto.

Endaumen en Tehnpas Sarawi

Lepin koasoai endaumen wehwehki “kisakis ehu.” Endaumen en tehnpas sarawi wia tiahk sarawi ehu me kahrehda Koht ketin ketkihong kumwail kapai sarawi kan. Irail wia kapai kan me Ih kelehpu kak kihda. Endaumen kak alahldihte nan Sapwellime tehnpas sarawi.





Alahldihn amwail endaumen sang tehnpas sarawi udahn pahn anahne wia ehü kemwekid sarawi keieu laud nan amwail mour. Tohto irail towe kan en Mwomwohdiso alehdi arail endaumen mwohn arail kohla wia arail misin de mwohn arail pwoapwoudla. Mehteikan ahnikihite ineng kehlail en wenla mwowe pohn ahl en inou. E inenen kesempwal en ese me amwail endaumen wia kishn amwail seiloak poatoapoat me keieu kesempwal oh lingan.

Ekei kisakis kan me kumwail alehdi sang ni endaumen en nan tehnpas sarawi iei:

- Eripit laud en Sapwellimen Kauno kahrepe kan oh padahk kan.
- Manaman en wia soahng kan koaros me Koht kupwurki kitail en wia.
- Kaweid oh poadoarepe mwahu ni atail pahn papah Kauno, atail peneinei kan, oh mehteikan.
- Kalaudehla koapwoaroapwoar, kaloalamwahu, oh meleilei.
- Kapai inou kan met oh kohkohahte.

Ahpw ni mehlel, kapai kaselel pwukat sang endaumen poahsoankihda uwen pwoson me kitail ahniki.

Pwehki tiahk sarawi kan oh inou sarawi kan en tehnpas sarawi me inenen sarawi oh kesempwal, towe kan anahne en warohng. Irail pil pahn anahne en wehwehki pwukoah keieu kesempwal akan me irail pahn alehda ni arail pahn wiahda inou sarawi kan rehn Koht.

Katengtengpene nan Tehnpas Sarawi

Peren laud nan mour dierek nan peneinei limpoak. En mie kehlail nan pwungen peneinei kan anahne en mie ngoang. Ahpw soangen ngoango kak wahdo peren laud nan mour wet oh mour kohkohahte. Pil nan soangen peneinei kan me nan pwungarail kan ahniki kahpwal de sohte koapwoaroapwoar mie, rongamwahu en Sises Krai kihong kitail koapwoaroapwoar, kaloalamwahu, oh kakehlail. Nan Sapwellimen Samatail Nanleng

pilahn en peren soutuk, ohl oh lih pwopwoud kak mihmi rehn neira seri kan kohkohahte.

Mweimwei en kihpene peneinei kan kohkohahte iei me kahdaniki manaman en katengtengpene. Iei manamanohte me Sises ketin ketkihong Sapwellime Wahnpoaron ko ni ahnsou me E ketket pohn sampah (kilang Madiu 16:19). Kapwopwoud kohkohlate eri kadanikiher katengtengpene. Seri kan me ipwidi de pwekpwekda nan soangen kapwopwoud kohkohla wet kak katengtenghng arail peneinei kohkohahte. Met e sohte duwehte kapwopwoud teikan me kin lelete erein ahnsou kis “lau lel ahnsou en mehla kumwail tohrohrpeseng,” katengtengpenehn nan tehnpas sarawi kasalehda me mehla sohte pahn katohrepeseng me poakpeneh kan.

Ohl oh lih pwopwoud me katengtengpenehr nan tehnpas sarawi wiahda inou sarawi kan me inenen sarawi rehn Kauno oh nan pwungara. Inou sarawi pwukat kamehlelehieng ira me nanpwungara pahn kohkohlate mwurin mour wet ma ira pahn mehlelieng ara inou kan.

Inou sarawi en kapwopwoud kohkohahte pil iang mih ni dakehn sepwilda. Sepwilda wet iei mour soutuk—soangen mour me Koht momourki. Koht kolokol kamarain koaros, manaman koaros, oh eripit koaros. E wia Koht kadek, limpoak, oh mahk emen. Sepwilda wehwehki me ehu rahn kitail kak duwehla Ih. E wehwehki me kitail kak kousoan Reh nan dake keieu laud nan wehin selestiel. Iei met me wia kisakis keieu laud me Samatail Nanleng kak ketkihong Sapwellime seri kan.

Kauno pil wehwehki me kaidehn Sapwellime seri kan koaros pahn ahniki ahnsou mwahu en kak kapwopwoud nan mour wet. E ketin inouki me koaros me alehda rongamwahuo oh wauniki arail inou sarawi kan pahn mie arail ahnsou en kapwopwoud oh nainiki seri kan, ma kaidehn nan mour wet a mour mwurin met.

Tiahk sarawi en katengtengpenehn peneinei kin kihpene pahpa nohno ohng seri kan en dih koaros sangete nin tapio. Pwehn



kadaiewei kapai pwukat rehn aramas koaros, irail kan me momour kak wia katengtengpene ong me melahr akan. Peneinei koaros eri pahn kak en mihmihpene kohkohlachte. Me duwehte tiahk sarawi kan koaros ong me melahr akan, katengtengpene pwukat koaros pahn wiawihthe nan tehnpas sarawi.

Kisin Likou en Mweimwei en Pidolong nan Tehnpas Sarawi

Pidolong nan tehnpas sarawi wia kemwekid sarawi ehu. Pwehki e wia Sapwellimen Kauno tehnpas, E ketin koasoanehdi koasoandih kan ong irail kan me pahn pidolong oh iang wia tiahk sarawi kan en nan tehnpas sarawi. Sang ni tuhpenehn iren kalelapak kan en alehdi kisin likou en mweimwei en pidolong nan tehnpas sarawi, towe kan pahn kasalehda me irail nannantiheng en idawehn Sapwellimen Kauno koasoandi kan. Nan ahnsou en tuhpenehn kalelapak kan, iren peidek kan mihmi ni teh nempe 16.

Irail me laud kan me towehkiher erein sounpar ehu kakehr ale arail endaumen oh katengtengieng peneinei. Tuhpene riau en iren kalelapak kan anahne wiawi pwehn alehdi kisin likou en mweimwei ong tiahk sarawi pwukat. Keieu irail pahn tuhwong arail pisop (de preseden en prans) oh mwuri arail preseden en steik de preseden en misin.

Irail towe kapw kan oh me pwulopwul kan me sounpar [eisek-ehu] 11 oh laudsang kak ale kisin likou en mweimwei en pedelong nan tehnpas sarawi pwehn wia pepdais en me melahr akan sang ni tuhpenehn kalelapak kan rehn emen irail pisoprik (de preseden en prans). Met me pahn kihong irail en kak iang wia pepdais oh kasarawiala kan nan tehnpas sarawi.

IREN KALELAPAK KAN ONG KISIN LIKOU EN MWEIMWEI EN TEHNPAS SARAWI

- Mie ahmw pwoson oh kadehdehpen Koht, Sahm Soutuk; Sapwellime Iehros, Sises Kraiss; oh Ngehn Sarawi?

- Mie ahmw kadehde en Sapwellimen Kraiss Tomwpen Dihp oh Sapwellime pwukoah ni ah ketin wia ahmw Sounkomour oh Soundoar?
- Mie ahmw kadehde en Kopwurupwurdohn rongamwahu en Sises Kraiss?
- Komw utung Preseden en Mwomwohdiso en Sises Kraiss en Souleng en Imwin Rahn-akan me wia soukohp, oh sarawi, oh sounkihla kaudiahl oh ihte ih aramas pohn sampah me kolokol oh ahniki mweimwei en doadoahngki kih koaros en prihsduhd?
- Komw utung irail kan me tohn Presidensi Keieu oh Pwihn en Wahnpoaron Ehk-riemen ko me irail wia soukohp kei, oh sarawi kei, oh sounkihla kaudiahl kei?
- Komw utung irail teikan me pil iang wia Kaun Lapalap en Mwomwohdiso wet oh irail kan me kakaun Mwomwohdiso wet nan ahmw wasa?
- Kauno ketin mahsaniher me mehkoaros pahn kin “wiawi ni mwakelekel” mwohn Sihlangi (Doctrine and Covenants 42:41). Komw kin nantiheng en ahniki lamalam oh wiewia mwakelekel? Komw kin kapwaiada kosonned en mour mwakelekel?
- Komw kin idawehn padahk kan en Mwomwohdiso en Sises Kraiss nan ahmw mour oh nan ahmw wiewia rehn tohn ahmw peneinei oh mehteikan?
- Komw kin utung de pwungki sohte lipilipil padahk, wiewia kan, de koasoandi kan me uhwong Mwomwohdiso en Sises Kraiss en Souleng en Imwin Rahn-akan?
- Komw kin nantiheng wauneki Rahn en Sapad, ni imwomwi oh ni ihmw sarawi; iang mihting kan; kaunopohng oh ale kamadipw sarawi; oh momourki mour me wauneki kosonned oh koasoandi kan en rongamwahuo?
- Komw kin nantiheng en kin mehlel nan mehkoaros me komw kin wia?

- Komw kin pwain meiroang en eisek-kis-ehu ni unsek? Ohng irail towe kapw kan me songosong en alehdi kisin likou en mweimwei en pedelong nan tehnpas sarawi: Komw pahn kak en kapwaiada kosonned en pwain meiroang en eisek-kis-ehu?
- Komw kin wehwehki oh peikiong kosonned en Mahsen en Eripit?
- [Ong aramas laud kan te] Mie ahmw pweipwand de soangen inou teikan ong ahmw pwoud en mahs oh seri kan? Ma mie, komw kin kapwaiada mepwukat ahnsou koaros?
- [Ong irail kan me endau ier te] Komw kin kolokolete inou kan me komw wiahda nan tehnpas sarawi, iangahki kin likilikauwi karment kan nin duwen koasoandi me komwi ale nan kasarawi en endowment?
- Mie dihþ toutou nan omwi mour me anahne en kansenoh ong sounkaweid en prishduhd kan pwehn wia kisehn omwi koluhla?
- Ni omwi madamadau, komw warohng en pidolong nan tehnpas en Kauno oh iang wia tiahk sarawi kan?

Pwurala ni Tehnpas Sarawi Ahnsou Koaros, Ma Kak

Ahnsou mwahu en kin kohla ni tehnpas sarawi wia kapai laud eh. Kohla ahnsou koaros, ma kumwail kak. Eshla mwahu duwen Sapwellimen Koht pilahn ong Sapwellime seri kan, kehn Sapwellime Ngehn, oh wia tiahk sarawi kan ong kadaudokamwail kan.

Sang ni tiahk sarawi kan koaros me wiawihher nan tehnpas sarawi, irail kan me melahr ese duwen sawas me kumwail wia. Irail ahpw pahn pilada ma irail pahn alehda dahme kumwail wia ong irail.

Iang wia tiahk sarawi en me melahr akan nan tehnpas sarawi pil kin pwurehng kihong uhk ahnsou mwahu en rong kapai kan, kaweid kan, oh inou sarawi kan. Sang ni pepehm kan me



kumwail kehn sang ni tehnpas sarawi, kumwail pahn kilang soahng kei me pilahn en komouro kapaiahkihda amwail mour oh mour en irail kan me kumwail poakohng. Dahme kumwail esehla oh kehn pahn sansalamwahula oh pahn inenen kesempwal ong kumwail ahsou werei. Ni amwail pahn pwarek, kumwail pahn kehn Sapwellimen Koht limpoak oh pahn katamanda dahme keieu kesempwal.

Wia Tohn Doadoahk en Tehnpas Sarawi

Tohn doadoahk en tehnpas sarawi kan wia towe kan me nainiki kisin likou en mweimwei oh pilada en papah nan tehnpas sarawi ni sohte isepe ni erein ahsou kan me irail mwahuki.

Tohn doadoahk kan en tehnpas sarawi sewese towe kan en wia arail doadoahk en tehnpas sarawi. Irail pil kin sawas nan ohpis en tehnpas sarawi de pil anahn teikan. Tohn doadoahk en tehnpas sarawi kan sohte kin ale pweipwei. Tohn doadoahk en tehnpas sarawi kan kak sohte pwopwoud de pwopwoud, me pwulopwul de me mah.

Ma kumwail men iang wia tohn doadoahk en nan tehnpas sarawi, kumwail menlau koasoaieng amwail pisop de preseden en prans.

